

**■ COLUMNA**


# Autoritarissem en ils chaus

DA GIUSEP NAY

Il stadi democratic liberal viva da premissas ch'el na sa betg garantir sez senza perder ses caracter liberal», quai è in dictum d'avant 60 onns d'in renumà anteriur derschader da la Curt costituziunala da la Germania. Quel vala oz – vis il svilup cun in individualissem adina pli accentuà e la digren da valurs communablas – anc pli che dal temp che noss vischins en il nord eran – sunter la catastrofa cun il naziunalsocialissem – sin via per etabliar puspè ina democrazia.

Democrazia munta suveranità e domini dal pievel ed in pievel è ina communad dad umans. Ed umans han tus la medema dignità ed uschia tuts il dretg d'avair ils medems dretgs fundamentals che garanteschon quella. In pievel che na respecta betg quai n'è betg vairamain ina cuminanza umana e na sa perquai betg furmar la dretga basa per ina suveranità ed in domini dal pievel en in stadi democratic.

La crux è dentant quella ch'il stadi democratic liberal na sa betg crear e mantegnair cun forza ina cuminanza umana, el na



fiss allura betg pli in stadi liberal. Ina tala è be garantida sch'ils members dal pievel èn cunscients tge ch'è in uman e tge consequentamain ina cuminanza umana, numnadamain be ina che respecta ils dretgs da mintga persuna. Plinavant ston quels esser prontos dad exercitar lur domini voluntariamain be sco ina tala cuminanza. Da quel fatg parta il dictum cità.

Ma tge sa esser caparra per quella schientscha e voluntad? Latiers tutga en emprima lingua la conscienza ch'ils dretgs umans èn inalienabls e che quels muntan cunzunt er ils dretgs dals auters. Nagin uman sa pretender per el dretgs ch'el n'è betg pront d'accordar a ses conumans. E co crear e mantegnair ina tala conscienza? Bain cunzunt cun tegnair ault tut las

valurs che garanteschon in respect vicendaivel sco conumans. Quel è adina puspè da cuntanscher en il dialog, ed in vair dialog consista surtut enten tadlar ed er udir l'opiniun da l'auter. Persuenter dovra i charezza betg mo per sasez, mabain er per tuts conumans enstagl da sprezz pli u main express per quels ch'èn d'in auter avis u da simplamain ignorar quels. Cun in pled ditg, i dovra ina toleranza che ha ses cunfin be là nua che toleranza vegn era pretendida per intoleranza.

Senza respect vicendaivel, S vair dialog e toleranza na funcziuna gnanc la pli pingu uniun u er suprastanza u cussegl da fundaziun e.u.v., nundir in stadi democratic e ses organs sin tut ses trais nivels da la vischnanca a la confederaziun. L'autoritarissem che tshivila sin ils dretgs umans, il qual regia en noss dis pli e pli en differentas terras e smanatscha da surpender er en Svizra, è ualti exact il cuntrari da tut quai. Uschè ditg ch'autoritarissem è dentant cunzunt en ils chaus da memia bleras e memia blers na sa quel betg vegnir impedì, e quai per donn e cust d'ina vera societad umana sco basa indispensabla d'in stadi democratic dign da ses num.